

UMS capai penarafan cemerlang MQA

KOTA KINABALU 25 Nov. - Berdepan generasi baharu yang lahirnya mengenal dunia tanpa sempadan, Universiti Malaysia Sabah (UMS) diingatkan untuk tangkas bergerak seiring dengan generasi tersebut.

Naib Canselornya, Prof. Datuk Dr. Mohd. Harun Abdullah berkata, dalam era tanpa wayar dan maklumat di hujung jari, UMS perlu bijak mengimbangi keperluan semasa, malah mampu menangani sebarang permasalahan yang dihadapi mahasiswa dengan sebaik mungkin.

Sehubungan itu jelasnya, penyediaan hab teknologi maklumat sentiasa ditambah baik bagi menyediakan kemudahan meneroka ilmu pengetahuan, sekali gus menyediakan penuntut yang cemerlang serta berpengetahuan luas.

“Usaha berterusan tersebut membolehkan UMS menerima pengiktirafan cemerlang atau Tier 5 dalam Sistem Penarafan Institusi Pengajian Tinggi Malaysia 2013 (Setara 2013) yang dikendalikan oleh Kelayakan Malaysia (MQA).

“Penarafan ini mengukur kualiti, tanggungjawab dan prestasi setiap institusi pengajian tinggi (IPT) dengan memberi fokus terhadap pengajaran serta pembelajaran di peringkat ijazah pertama. Kejayaan ini membuktikan UMS diiktiraf setanding dengan IPT lain dan perlu dipertingkatkan dari semasa ke semasa,”

katanya.

Beliau berkata demikian ketika berucap dalam majlis kemuncak sambutan ulang tahun ke-20 UMS di sini malam tadi.

Majlis itu turut diserikan dengan kehadiran Yang Dipertua Negeri, Tun Johar Mahiruddin dan isteri, Toh Puan Norlidah R.M Jasni.

Yang turut hadir bekas Canselor UMS pertama, Tun Sakaran Dandai; Pengerusi Lembaga Pengarah UMS, Tun Zaki Azmi dan bekas Pengerusi Lembaga Pengarah UMS pertama, Tan Sri Dr. Abdul Hamid Egoh.

Terdahulu dalam majlis sama, Johar menyempurnakan pelancaran Tabung Dana Alumni UMS yang bertujuan merencanakan lagi jalinan kerjasama antara universiti dengan alumni.

Mengulas lanjut, Mohd. Harun berkata, kejayaan mencapai tahap cemerlang itu menggambarkan keazaman semua pihak di UMS dalam menambah baik kualiti pembelajaran dan pengajaran secara berterusan.

Menurutnya, UMS sebelum ini berada pada kedudukan Tier 3 (Baik) dan Tier 4 (Sangat Baik) bagi penarafan yang dilakukan pada 2007 dan 2011.

“Insya-Allah, dengan komitmen tinggi dan usaha gigih seluruh warga UMS, universiti ini mampu mencapai penarafan terbilang dalam tempoh terdekat,” tambahnya.



ANGGOTA penguat kuasa Maritim Malaysia memeriksa minyak kapal tangki yang berlabuh tanpa kebenaran di perairan Pengerang, Kota Tinggi, Johor, semalam. - IHSAN MARITIM MALAYSIA